

عاطف افندی کتبخانه سی

نشریاتندن

عدد

۳

فرنك مقلد لکی

و

شایقه


محرری: فاتح درس عام لرندن اسکایی

محمد عاطف

صاڈیشن محلی: بایزیدده حکاکارده (۴۷) نومرولی دکان

استانبول — مطبعه « قدر »

۱۳۴۰



فربك مقلد لكي وشابقه

بِسْمِ اللَّهِ الرَّحْمَنِ الرَّحِيمِ

الحمد لله الذي اباح لعباده الزينة واحب ان يرى عليهم آثار النعمة
والصلاة والسلام على سيدنا محمد الذي نهى امته عن التشبه بالملل الغير
الاسلامية وعلى آله واصحابه الذين اجتنبوا عن تقليد الفسقة والفجرة
[تقليد]

مقلد : تقليد ايدين ديمكدر .

تقليد : حسن ظن ايديوب محق اولديني اعتقاد ايمك سبيله بر
كيمسه يه اعتقاده ، قوله ، فعلده ، صورت وسيرته بلا دليل اتباع
واقندا ايمك وآ كا بكزه مك ديمكدر .

شرع شريف نظر نده على الاطلاق تقليد جائز دكلدر . از جمله
مجرد نظر واستدلال ايله وقوف ممكن اولان اصول اعتقاديه واساسات
اسلاميه ده معجزات ايله مؤيد اولان رسول ذیشان (صلى الله عليه
وسلم) اقدمزدن بشقه هيچ بر كيمسه يه تقليد جائز دكلدر . بو باده
هر فرد اجمالاً ويا تفصيلاً مستعمل اولمق لازم وواجبدر . بناءً عليه
استدلال قدرتي اكتساب ايمان كناهاكار اولور .

فقط امور عباد ، معطل اولمه مق ايجون يالكز فروع شرعيه ده

یعنی عبادات و معاملاتده درجهٔ اجتهاده واصل اولیائتک مجتهد لره تقلیدی ، ضرورهٔ مشروع قیلنمشدر .

شوقدر که امر دینده مقصد علیه اولان نصوص شرعیه مخالف اولان خصوصاتده (لاطاعة لمخلوق فی معصیه الخالق = خالقه معصیت اوله جق ایشده مخلوقه اطاعت اولنماز) حدیث شریفی مقتضای منیفنجه نهر مجتهدک ، عالمک ، شیخک ، نهده خلفاء ، امراء ، حکما ، فلاسفنک اعتقاداته ، عبادات و معاملاتده ، اخلاق و آداب دائر سوزلرینه ، فملرینه ، اتباع ، اتقیاد ، تقلید و تشبه قطعاً جائز دکلدو . خلاصهٔ کلام بدعت قبیحهده ، منکرات و مناهیده و شرع شریفه مخالف اولان اصول و معاشرات مدنیتده هیچ بر کیمسهیه تقلید اصلا جائز دکل ، نهده قالدیکه شعار کفرده ملل غیر مسلمهیه تقلید جائز اولسون بوقطعیاً جائز اولماز .

شو حالده بر مسلمک شعار و علامت کفر عد اولنان بر شیئی بلا ضرورهٔ کینمک و یا طاقینمق صورتیه غیر مسلملره تقلیدی و کندیسنی آنلره بکنزه تمسحی شرعاً منهی ممنوعدر . بو خصوصه اجماع امتده انقاد ایشدر . بونده شک و شبهه یوقدر . زیرا رسول ذیشان (صلی الله علیه و سلم) اقد صریحاً یور مشاردر که (من تشبه بقوم فهو منهم = بر قومه بکنزه مکه چالیشانلر او قومدنر) (امام احمد و ابوداود) تشبه : بشقه لرینک ایشلدیکی برایشی اونلره تبعاً ایشله مک دیمکدر . شو حالده حدیث شریفک معناسی : بر قومه بکنزه مکه اوزه نلر بکنزه مک ایسته نیلن قدر مشترکده اونلردنر ، او قدر مشترک کفر ایسه کفرده ، معصیت ایسه معصیتده ، صلاح حال ایسه صلاحده ، بونلرک شعاری

ایسه شعارده او قومك حكمنه تابع اولورلر ديمكدر . بناء عليه :

بو حديث شريف اهل كفر و ارباب فسقه بكنزه بشدن نهی
و ترهیبی متضمن اولدینی کبی اصحاب صلاحه بكنزه مكله تشويق
و ترغیبی ده مختویدر . چونكه حديث شريفده (قوم) لفظی مُسَكِر
اولدیندن هم صلاحیه ، هم غیرلرینه شاملدر . نبی معظم (صلی الله
عليه وسلم) افندیز دیکر بر حديث شريفده بیورمشاردرکه (لیس
منامن کتبه بغیرنا = بزون بشقه لرینه بكنزه مکه اوزه نلر بزون ،
بزم ماتمزدن دکدر) (الجاهع الصغير)

بو حديث شريف منطوقی اعتباریه شعارلرنده ملل غیر مسلمه یه
تشهدن ترهیبی متضمن اولدینی کبی صورت و سیرت لرنده صلاحی
مسلمینه تشبه ترغیبی ده مشروردر .

شو حالده بو حديث شريفك مقتضای عالینجه اهل اسلام
طریق و شعار کفر و علامت بدعت قبیحه عداولتان شیرده اهل کفره
و بدعت قبیحه اربابنه تشهدن منع ونهی اولنمشدر .

اساساً دین اسلامده کفر و معصیت نهی اولدینی کبی شعار کفر
و شعار معصیت ده نهی در .

اهل کفر و ارباب معصیته طریق و شعارلرنده تشبه ایسه اکثریا
یا کفره و یا معصیته و یا ایکیسنه ذریعه اولدینی ایچون شریعت احمدیه ده
منع اولونوب حرام قیلنمشدر . واقعا ایلك هجرت نبویه زمانلرنده
یهودیملر نه شعارده ، نه لباسده ، نهده بشقه بر علامت مخصوصه ده
مسلمانلردن تمیز ایتزلردی ، رسالتپناه افندمرك بو خصوصه سکوت
بیورملری بو حلال ، شروعتنی کوسترنگده ایدی . فقط بالآخره بو

حکم فسخ اولتوب شعار و طریقتده غیر مسلملردن مفارقت مشروع قلمشدر. بونک سینه کلنجه هجرت نبویه نك ایلک زمانلرنده مسلمانلر ضعیف اولدقلرندن غیر مسلملاره مخالفت هنوز مشروع قیلنمه مس ایدی بالآخره دین مبین اسلام ادیان سائره یه غلبه ایلوبده اهل اسلام کفار ایله جهاده و آنلره جزیه وضعنه کسب قوت ایلینجه طریقت و شمارده ازلردن مفارقت مشروع قیلنمشدر .

دیك اولیورکه هر عصرده ، هر بلده ده ملل غیر مسلمه نك طریق و شعاری هر نه طرزده اولورسه اولسون اهل اسلام بلا ضروره او طریق و او شمارده کندیلرینی آنلره بکنزه تمکدن و آنلرک اطوار و عاداتنه اویمتدن منع اولنمشدر . نته کیم (من احدث فی امرنا هذا مالیس منه فهو رد) هر کیم بزم شو ایشیمزده ، یعنی دینمزده آندن اولیمان بر شی احداث ایدرسه اوشی مردوددر) حدیث شریفیله اصول و براهین دینییه مستند اولیه رقی رأی مجرد ایله امور دینییه ده زیاده و یا نقصان قیلنمق صورتیله یکی برشی احداث ایتمکدن ، بر بدعت وجوده کتیرمکدن منع اولنمشدر .

یوقسه کرک اهل سنت و ارباب ضلال و کرک اهل کفر طرفندن احداث و ایجاد اولنان هر بدعتدن و هر یکی یا بیلان شیلردن و اهل کفر ایله ارباب ضلاله مطلقا مشابعتدن نهی و منع اولنمش دکلدردن زیرا اویوق ، یا تمق ، اوتورمق ، ییک ، ایچمک کبی امور طبیعیه ده مشابعت ضروریدر . بوندن باشقه آلات زراعت ، ادوات صناعت ، و سائط حرب ، یا ناق و مطبخ طاقی کبی ، امر دیندن اولیوبده کندیلریله یالکیز عرض دنیوی مقصود اولان امور مباحه بی احداث

مشروع وحتی بونلردن بمضیلری مأمور بهدر . بناءً علیه بدعت عادیه
نوعندن اولان بوکی امورده ملل غیر مسلمیه تقلید و بو خصوصده
آنلره مشابہت منہی و ممنوع دکلدر .
[دین اسلام نظرندہ مدیت ضریبہ نیک مشروع اولان

واولیان جهتلی]

بو بحثه شروع ایتمزدن اول شونی عرض ایدیمکه : مدیت
ضریبه ، مادی و معنوی ایکی جهتی حائز اولدینی کی بونلردن هر
بری بشریته نافع ویا مضر اولق اوزره ایکیشر قسمی حاویدر .
حالبوکه دین اسلام بشرک روحانی و جسمانی غذا و تکاملنی کافل
اولان بتون فضائل و کمالاتی اسر ایلیوب بونی اخلاص ایلین رذائل
وقبایحی منہی و منع ایدر . بونقطه نظرندن فطرت بشره الیه موافق بر
دین اولدیقندن دین اسلامه دین فطرت تسمیه اولتمشدر . بو اصل
واساسدن طولانی درکه :

دین جلیل اسلام (من سن فی الاسلام سنة حسنة) فله اجرها
واجر من عمل بها من بعده من غیر ان ینقص من اجورهم شیء =
بر کیمسه دین اسلامه موافق بر طرزده بین المسلمین بر طریق فضیلت
ایجاد و کوزل بر شی اختراع ایدرسه اونک اجر یله قیامته قدر ارشی
ایله عامل اولانلرک اجر و ثوابنک برر مثلی او کیمسه یه عائد اولور .
آندن صکره اوشی ایله عمل ایدنلرک کندی حصه لرینه دوشن اجر
و ثوابدن هیچ برشی نقصان قیاماز) و (اتم اعلم باس دنیا کم =
حقیقده بیان شرعی وارد اولیان دنیا ایشلرینی سز دها ای بیایر سیکنر) .
حدیث شریفلری ایله امور دنیا دن دیکیش ایکنه سندن طو توب ده

دمیر یوللرینه ، طوپلره ، زرهلیرله ، طیاره لره ، وسائط مخبریه ، بری و بحری تجارتیه ، صنایع مختلفهیه ، استعمار ارضه ، فابریقه لره ، آلات زراعت و ادوات صناعتیه و هر عصره کوره ارکان و اسباب جهاده و ارنجهیه قدر مدینتک مادیات قسمندن بشریتیه نافع اولان امور مباحه و حسنیهی احداث و اختراعه مساعده بیوره شد . و حق

طَلَبُ الْكَسْبِ فَرِيضَةٌ عَلَىٰ كُلِّ مُسْلِمٍ وَمُسْلِمَةٍ (حدیث شریفیله ناسه محتاج اولیه جق درجهده حلالندن مال قزاقمقلنی هر مسلم و مسلمهیه فرض قیلهرق امر معیشتده بشقه لرینه . یوک اولیوب هر کسک مساعی ذاتیه سی ایله کینمکی مسلك ایدیغسی امر ایتمش و) (وَأَعِدُّوا لَهُمْ مَا اسْتَطَعْتُمْ مِنْ قُوَّةٍ) (نظم جلیلی ایله عصرینه کوره دشمنی ترهیب ایده جک درجه آلات و اسباب جهادک اعداد و احضار اولنسی فرض قیلمش و) (طَلَبُ الْعِلْمِ فَرِيضَةٌ عَلَىٰ كُلِّ مُسْلِمٍ وَمُسْلِمَةٍ) (حدیث شریفی ایله ده علوم دینه دن تصحیح اعتقاد ، تهذیب اخلاق ، اصلاح اعمال ایده جک قدر او کره نمکی هر مسلم و مسلمهیه فرض عین قیلدقدن بشقه بقای ابدانه ، ادامه حیاته و بین الناس معاملاتیه دائر محتاج اولنان فنون و صنایعدن بشقه قوم و ملتله احتیاجدن مستغنی اولنه جق درجه ده او کره نمکی مسلمانه فرض کفایه قیلمشدر . شو حالده آنلردن برطائفه ، علوم و صنایعدن بو درجه سی او کره نمزلر سه کافه سی کناهار اولوب دنیا و آخرتده بو قصور لرینک جزا و ضرر لرینی چکرلر . دین مبین اسلام اقسام مدینتدن استعمار ارض و علوم ، فنون و صنایع کی امور نافعیهی امر ایدوب بشقه اقوامه احتیاجدن اغنا

ایده جك درجه سنی او کرده نمی مسلمانان را فرض قیلمش اولدینی
ایچوندرکه مدنیت اسلامیه ادوار عالیه سنده عزایای ممتازینی جامع
صنایع بدیعه اختراع ایلشدره. اورویا مشاهیر اجتماعینندن (کوستاو
لوبون)ك بعض آثار یله کتب توارینخدن مستفاد اولدینی اوزره مدنیتك
سائر عناصر اساسیه سی کبی صنایع ده آتی ویا بدی بیک سنه اول
(دین سماوینك مهد ظهوری اولان) آسیا قطعه سنده آتورسکنه سی
طرفندن اختراع اولونوب بالآخره مصره نقل اولمشدر. قرون
اولی ده کی یونان صناعاتی دجه و نیل سواحلنده اختراع اولونان صناعاتدن
دوغمشدر .

دین جلیل اسلامك ظهور یله ششمه دار بر مدنیت فاصله اسلامیه
تأسس ایدنجه مسلمانلر اوزمان موجود بولنان مصر و یونان صناعاتی
اقتباس ایدرهك آز زمان ده اصلارینه فائق بر شکل نوینه افراغ ایله
عزایای عالیه بی محتوی صنایع بدیعه وجوده کتیروب مصر و یونان
مدنیتنه تفوق ایتمشلردر. آثار باقیه اسلامیه بو مدطاتك بر شاهد
قادیلدر .

بعض عمالک اسلامیه بی استیلا ایدن صلیبونك صنایع نفیسه اسلامیه بی
اقتباس ایله قسماً آورو یابه نقل ایتش اولمیری بو کونکی غرب صناعاتك
ترقی وانکشافی اسبابندن بری در. وحتی ایلک اوکجه مدنیته قارشی
غریبلیرك قلبنده برشوق ازیاندران جاذبه، اندلس آفانده لمعان ایتش
اولان مدنیت اسلامیه ضیا سیدر. اونارینخدن اول غریبلیرك جهل، ظلمت،
وحشت، هرج و مرج ایچنده بویان اولدقلرینه تاریخ شهادت ایتمکده در.
دیك اولیورکه اساس اعتبار یله مدنیت غریبه نك مولدی شرفدر .

دین مبین اسلام مدینتک اقسام نافعہ سنہ ارشاد ایلدیک و مدینت اسلامیہ جہ وقتیلہ یک مهم آثار خارقه وجودہ کتیرلدیکی حالده زمانزده کی مسلمانلرک بو فضائل عالیہ دن محرومیتلرینه سبب نہدر دیہ سؤال اولنورسه جواب اولهرق دیرزکه : محروم قالدقلمری سائر خصوصاتده اولدینی کبی بوکاده سبب اوامر منیفه دینه مقتضیاتدن بولنان سعی و عملہ توسل ایتمه ملریدر . دین اسلامک ارشاد ایلدیک فواید عالیہ دن استفادہ آنجق اوامر و احکام حکیمانہ سنہ امتثال و مقتضاسیلہ عمل ایتمک متوقفدر ، شو حالده ادعای اسلامیتده بولنانلرک قواعد دینیه پی یالکز کتب و اوراقده حفظ ایتملری هیچ بر فائده تأمین ایده میه جکی کبی مقتضای دیانت اوزره اعصاب و اعضای بدنیه لرینی تحریک ایتمکده مجرد اعتماد ایله مطلوب اولان فواید ماده و معنویه حصول پذیر اوله ماز .

رسول معظم صلی الله علیه وسلم افندمن بر حدیث شریفنده بیورمشلردر که (وَانِ مِنَ الْعَالَمِ جَهْلًا = بعض علم جهل ایله مساویدر) . فی الحقیقه عملہ مقرون اولیان علم جهل ایله مساویدر . عملسنز عالم رو عوامدن اوز اقلاشمش اولماز منافع علمیه دن محروم قالمق اعتبار ایله بویله طالمک جاهلدن فرقی یوقدر منلا مسکراتک حرمت و مضر تی بیلدیک حالده استعمال ایدن بیلیمیه رک استعمال ایلمن ایله مساویدر . بلکه اولکی ایکنجیدن ده ا زیاده مستحق مذمتدر . بنا علیه کرک ارباب علم و کرک ارباب دین ، علم و دینک مقتضای منیفی اوزره حامل اولماقجه بولنرک تأمین ایلدیک فیوضات و سعاداته مظهر اوله مازلر . معروضات سالفه دن مستبان اولدینی اوزره دین مبین اسلام ، ارکان و عناصر مدینتک مادیات قسمندن امور نافعہ و حسنہ نک احدانسه مساعده ایدوب

مشروع قبله قد نبشقه بونلری احداث و اختراع ایلمن ملتله بو خصوصاً صانده
تقلیده ده رخصت ویرمشدر .

فقط دین جلیل اسلام (قل انما حرم ربی الفواحش ما ظهر
منها وما باطن والاثم والبغی بغیر الحق وَاَنْ تُشْرِكُوا بِاللّٰهِ مَا لَمْ یَنْزِلْ بِهِ
سُلْطٰنًا وَاَنْ تَقُولُوا عَلٰی اللّٰهِ مَا لَا عِلْمُ لَنَا بِهٖ) جیم دیکه ربم کیزی
و آشکار اولان کاهه فواحشی، یعنی انسابه دائر عموم جنایاتی ، منبع
اتم اولان مسکراتی یعنی عقوله عائد جنایاتی ، بغیر حق بغی و ظلمی
یعنی نفوس و امواله دائر اولان جنایاتی و اللهه شرک ایله آنک حقنده
بیلمدیکز شیملری سویله مکنزی یعنی دیانتیه دائر ارتکاب جنایت
ایتمکنزی حرام قبلدی). نظم جلیلی ایله الحاده ظلم، شقاوت، فحش،
ایچی، قمار، دانس، بار، تیاترو وسائر سفاهت ایله میخانه، کارخانه،
قارخانه ، دانس و بار محملری کشادی کبی مدنیت غریبه نك مادیات
قسمندن اخلاقاً، اجتماعاً، اقتصاداً ، ناموساً و دیناً مضر اولان امور
رذیله و قبیحه نك كافة اصول و فروعنی حرام قیلوب منع ایلمشدر .
بناءً علیه مدنیت غریبه نك بو کبی رذیلت جهتلری غیر مشروع و عدرد. [*]

[*] آنک ایچون رسول معظم صلی الله علیه وسلم ائندیز (من سن فی
الاسلام سنةً سیئةً فعلیه وزرها ووزر من عمل بها من بعده من غیر ان یتقن من
اوزارهم شیءٌ = برکیمسه دین اسلامده فنا بریول احداث و چرکین برشی
اختراع ایلمشسه او فثالثک و زور و بالای ایله قیامته قدر اونکله عمل ایلمشک
وزر و بالرندن برره ملی او کیمسه به عائد اولوره آتدن صکره او فثالثی ایشله بئلرک
کندی وزر و کناهلرندن هیچ برشی نقصانی قیلنماز) حدیث شریفی ایله بین
المسلمین چرکین و فنا برشی اختراعندن و بر طریق رذالت احداثدن منع و ترهیب
بیورمشدر .

شو حالده بويله امور رذيله و قبيحه ده افراد مسلميندن هيچ بريسنگ زمانك موده سنه او عيسنه، بشقه سنه وبالخاصه ملل غير مسلمه به تقليد ايلسنه، تعمير ديكر ايله ضريلاشمسنه، آوروپا ايلاشمسنه اصلا مساع شرعي يوقدره. زيرا مشروعيته دليل وبرهان قائم اوليان شيلرده تقليد وغيره اتباعك حرمت وبطلاننه بو آيت جليله اك قوتلي بردليل قاطعدر. بناء عليه دين مابين اسلام كافة امور واحوال رذيله نك هم رأساً احداث واجراسنى، همده بو بابده بشقه لرينه تقليد وتشبهى صورت قطعده منع ايليوب حرام قيلمشدر.

مدنيتك جهت مغنويه سنه كانجه : شريعت مطهره احمديه اويله عالى قواعد مدنيه و اساسات اجتماعيه و اويله اخلاق فاضله وضع و تأسيس ايلمشدر كه آوروپا او درجه تمدنه وصول ايچون دها بك چوق امكان صرف ايتمهك و حتى تماماً قواعد مقدسه اسلاميه ي قبول ايدويورمهك محتاجدر. او درجه مدنيت فاضليه ارتقا ايچون بشقه دورلو يول يوقدر.

اساساً مدنيت غريبه، سعادت و تكامل بشرى كافل بر مدنيت حقيقيه دكلدر. زيرا او آنجق انسانك بهيميت و جسمانيت جهتك سعادت و تكاملنه خدمت ايدوب ملكيت و مغنويتك سعادت و تكاملنى اصلا نظر اعتباره آليور. چونكه مدنيت غريبه حيات بشريه يي آنجق حيات فانيه دنيا دن عبارت تلقى ايلديكي ايچون بشرك يالكتر ماديت و حيوانيت جهتك تكاملنه عطف اهميت ايدويور. بو صورتله افراد بشرده آثار بهيميتك انكشافه باعث اولوب ملكيت و حقيقي انسانيتك كمون و يابوسبتون احساسنه خدمت ايدورك سعادت سرمديه به

ایصال ایلین فضائل و کالات حقیقه دن بشری ابدیاً محروم براقیور .
وانما حیات جسمانیه و دنیا به دائر کالات بشریه نك حصولنه بر درجه به
قدر مدار اوله بیلور سده آنک مدار اولدینی احوال و اوصاف ، حیات
دنیا نك انقراضه متقرض اولوب کیدیور . معروض زوال و انقراض اولان
احوال و اوصاف ایسه سعادت حقیقه دن حد اولنه مازه سعادت حقیقه : حیات
دنیا دن صکرده دوام ایدوب بقا پذیر اولان اوصاف و کالات بشریه دن
عبارتدرکه بونک مرشدلری آنجق انبیای عظام حضراتیدر . مدنیت غربیه نك
بوکارهبر اوله بیلرسی غیر قابل امکاندر .

حالبوکه مدنیت فاضله اسلامیة بشرک ملکیت و معنویت جهتنک
سعادت و تکاملنه خدمتی اصل و اساس اتخاذ ایدوب بتون اصول
و احکامنی بو جهتنک انکشاف و تکاملنه خادم اولمق اوزره وضع
و تأسیس ایشدر . شو قدرکه بهیمیتک سعادت فانیه سی مقصود بالذات
حکمل ، بلکه ملکیتک سعادت باقیه سی اکتسابه وسیله اولدینی ایچون
تبعاً مقصود اولغله بو مقصد اصلی بی اخلاص باعث اولمق اوزره حد
اعتدالی تجاوز ایدوب مسنی اساس اتخاذ ایدوب صورت معتدلانده
اذواق جسمانیه دن استفاده یولنی کشاد ایش و بوضورتله بشری هم
سعادت فانیه به ، هم سعادت باقیه به ارشاد ایشدر . شو حالده سعادت
باقیه و کالات حقیقه به آنجق مسلك انبیا ایصال ایدر . بناء علیه مدنیت
فاضله اسلامیة بر مدنیت حقیقه درکه دساتیر عالیه سنه تماماً تمسک ایدملک
شرطیله هر جهتدن سعادت و تکامل بشری کافل و حیات فانیه دنیا دن
صکرده بقا پذیر اولان اوصاف و کالات حقیقه بی ضامندر . بناء علیه
سعادت حقیقه بشریه سنن انبیایه اتباع و مدنیت فاضله اسلامیة به تماماً
تمسک ایله حصول پذیر اولور .

شوحالده مدنیت غریبه حد ذاتنده ناقص وتکامل حقیقی بی مغل اولد
یغندن اصول وقواعد مقدسه اسلامیه بی ومسلک انبیائی تماماً قبول ایتدکجه
نفس الامرده وعقول سلیمه اربابی نظرنده مدنیت حقیقیه عد
اولنه ماز .

بناءً علیه سعادت ابدیه وکالات حقیقیه بی اکتساب ایتک ایچون
اهل اسلام مدنیت غریبه یه دکل، ضربیلار مدنیت اسلامیه محتاجدره
دیمک اولیورکه دین جلیل اسلام : مدنیتک جهت ماده وجهت
معنویه سنک ملکیت وبهمیتجه بشریته نافع وخادم اولان اقسامی
اون اوج عصر اول رأساً وضع وتأسیس ایله یوب ابنای بشری
اوشهره مستقیمه سوق وارشاد ایشدر [*] .

[*] اساساً بین المسلمین تعالی و ترقی ایتدیرلسی مطلوب اولان مدنیتک ایشته
یو نوعیدر . بالخاصه ملکتمزک احتیاجی مدنیتک فضیلت قسمته دره . حالبوکه
ملکتمده ترقی ایتدیریلن بو دکل، غرب مدنیتک ذیلت ومضر قسمیدره . چونکه
ایچه برزماندن بری ملکتمزده ، مفرط ضرب مقابلی برشرذمه قلیله مدنیت ،
حریت ، ملیت نامنه غیر مشروع ومضر جهتلردن مثلاً ~~صوت~~ ، فحشاک ،
ایچکینک ، دانسک ، اخلاقسزلنک، دینسزلیکک تعمیم وتوسیمعدن باشلايور .
آوروپادن بوکله یوب کتیره بیلدکلری لوئیات ایله اخلاق فاضله اسلامیه بی
تخریبه ، افکار ملتی تلویشه چالیشیورلر . اولاد وطنک قلبی بیانچی روح ،
بیانچی تربیه ، بیانچی اعتیاد ایله آشلایورلر آشلایورلرده اوزلرنده
تمرکز ایتش اولان روح اسلامیت وتورکلی سوکوب آتمه اوغراشیورلر . بو
صورتله موجودیت ملیه مزک استنادکاهی اولان نملار بیقبولب دوریور .
بوضالات عظیمه نکه تعسی هم اسلامیت ، هم تورکک ایچون باعث تلف اولسه کرکدر
مدنیت غریبه نکه ذیلت قسمی ملکتمزده کوندن کونه مظهر ترقی اولوروبواوغورده

مدینتک ملکیت و بهیمنیتجه بشریته مضر اولان اقسامنده افراد
بشری درکته بهیمنیته تردی و انحطاطدن تخلیص ایچون منع ایلیوب
بو خصوصاتک ارتکابنی و بو باده بشقلریته تقلید و تشبیه صورت
قطعیهده حرام قیلمشدر . شو حالده آوروپانک شائبه سفاهت ورنک
ملیتدن عاری وبتون انسانیتک تکاملات مادهسنه خادم اولان علوم،
فنون و صناعاتک، آلات وادواتک جملهسنی اخذ و تلتی و بو خصوصاتده
آنلری تقلید مشروع و مرغویدر .

فقط میخانه ، کارخانه ، دانش ، بار ، تیاترو وسائر مؤسسات
سلفیه و ترقیات سفیهانه کبی هویت دینه و اخلاق فاضله اسلامیته
محو و ازالهسنه باعث اولان اعتقادات باطله، اخلاق قبیحه، اعتیادات
رذیله، افعال و اعمال مذمومهسنی اخذ و تلتی و بو خصوصالرده آنلری
تقلید غیر مشروع و منفوردر .

دین اسلام ایشته بو نوع مدنیت سفیهانه تک ترقیسنه مانعدر .
چونکه دین مین اسلام بین البشر جریان ایلن امور قبیحه و اعتیادات
رذیله تک کافهسنی هدم و منع ایچون وضع و تأسیس اولمشدر . آنک
ایچون اسلامیت مدنیت غربیه تک بو قسمی ایله اصلا اجتماع ایده عز .
قلبری غرب لوئیاتیله صبغه لائش اولانلر بو نقطه نظر دن دین اسلامی
عظیم مقدارده ثروت ملیه صرف اولنور . فقط مشروع و کمال شدتله محتاج اولنان
جهتلره مثلا البسه تک اعمالی ایچون برفا بریقه به هیچ برشی صرف ایلدیکی کورلیبور .
دیگ اولبورکه آثار خارجیهرینه نظراً مدنیت غربیه صوجلکننده بولنانلر
بو پرده آلتنده منافع شخصیه لرینی تأمین و آرزوی شهوانیه لرینی تطمین غایهسنی
استهداف ایلوب منافع عمومیه و فوائد عالیه ملیه بی اصلانظر اعتباره آلیورلر ویا آله میورلر
ادعا ایلدکلری قوللرینی افعال مشهوره لری تکذیب ایتمکدن خالی قالبور .

مانع ترقی کو ریورلر. اوت بوده مدنیتن معدود ایسه دین اسلام بو
کبی مدنیتنک ترقیسنه یکانه مانع عظیمدر. اساساً سفاهت و رذالتی منع
ونهی ایلمک دین اسلامک خواص مجیزه سندندر. عقل سلیم ده بونی آمردره
آنک ایچون آوروپالیردن عقل سلیم اربابنک مملکتلرنده تعهم ایتمکده
اولان سفاهت و رذالتک منعه چالیشدقلری مسموع اولمقده در. از جمله
انکلتزده حیاسزلقله مجادله ایتمک اوزره (میستروب آیوب) اسمنده
بر انکلز (زاهت جمعیتی) نامیله یکی بر جمعیت اخلاقیه تأسیس ایتمشدره
جمعیت ایلمک اجرا آت اولمق اوزره اخلاق عمومی بی افساده باعث
اولان قارت بوستاللرک فروختنی منع ایتمدیرمک ایچون حکومته مراجعته
قرار ویردیکی غزته لرده کورولمشدره جمعیت اقوامده اخلاق عمومی بی
افساده باعث اولان آچیق رسملر ایله آچیق یازیلرک منعی ایچون
دولتاره تبلیغاته بولنمشدره .

(توکیو) ده مأمورین محلیه طرفندن اخلاق عمومی بی افساد
ایتمدیکی سبب کوستریله رک بوتون عصری دانسلر منع اولنمشدره .
اساساً آوروپاده سوزلرینه اعتماد اولنان هکیملر ایله اجتماعیات

علملری دانسک مضرتلرینی دلائل مقنعه ایله میدانه قویتمشدردره .
از جمله دانسک مضرتلرینی اثبات ایچون دیورلرکه : یقیناً ثبوت
بولمشدرکه : دانس فردلرک سنجیه سنی ، اخلاقی ، صحتی تخریب
ایدوب مسلط اولدینی جمعیتلرک معنوی بنیه سنی کیرد کدنبشقه فحشی
آرتدیروب مناکاتی آزالتهرق نفوس بحرانی دنیان فلاکتی احداث
ایتمک صورتیله ملتک ماده انطفاستی تعجیل ایدیور .

ضرب متفکرلرینک ، عقل سلیم اربابینک ، دانس ، ایچکی کبی ضربک

مدنیت کسوه سی آلتنده بین البشر تعمیم ایله مکده اولدینی رذائلی قبیح ایتمکده بولندقلرینه شاهد اولوق اوزه معروف مسکرات دشمنی آمریقالی مستر (ویلیام ژونسون) ک ۱۹۱۱ ایلول ۳۰ تاریخنده استانبولده بولندینی زمان مسکرات عامینده غزته جیلره واقع بیاناتی اراهه و بو مقامه قید ایتمک ایسترم : مووی الیه دییورکه : مسکرات ممنوعیتی فکری، ضرب مفکره سنک محصولی دکلدرد. بو فکر، اساس اعتباریله تامایله شرقلیدره مسلمانلق اون اوج عصر مقدم صورت قطعیده مسکراتی منع ایتمشدر. بناء علیه آمریقانک کشفندن بر چوق عصر مقدم شرقلده ممنوعیت فکری تامله شمش ایدی. بو کون ایسه اسلام دینک تلقین و تعلیم ایتمیکی مسکرات ممنوعیتی آمریقانک قوانین اساسیه سنه کیرمش بولنیور .

حالبوکه : تام بز مسلمانلقک امریله عامل اولوب مسکراتی منه قالدشدیغمز زمان نه ضربیدرکه سز، بز مذموم کور دیکمز بر شیشی تقلیده یلته نیورسکز . غرب، شرقک بر فضیلتی قبوله اوضاشیرکن سز ضربک بر رذیلتی تقلید ای دییورسکز بو، سزک لهکزده بر شی دکلدرد .

آمریقانینک بوسوزلری ضربک رذائلی تقلیده چالیشان شرقلیلر ایچون بلیخ بردرس عبرت تشکیل ایدرد. بوندن عبرت آلمه مق، متأثر اوله مق ایچون انسانک درکه همیشه تردی ایدوب شعوردن محروم اولماسی اقتضا ایدر .

بورایه قدر عرض اولنان تفصیلاتدن شعار و علامت کفرده ملل غیر مسلمه یه تقلید و تشبهک شرعاً حرام اولدینی آکلاشیلمشدر .

موجب کفر اولوب اولماسنه کئنجه: بو خصوصده بين العلماء اختلاف اولمشدر . فقط بو مسئله نك حلي ايمان ايله کفرک حقيقتي معرفته متوقف اولديني همچون مقصده شروع ايتزدن اول برارده آندن بحث ايتمک ايسترم .

(ايمان و کفر)

ايمان : رسول اکرم (صلى الله عليه وسلم) افندمرك الله تعالى طرفدن کتيروب خبر ويرديكي ضروره و يقيناً بيامين اصول دينيه واحكام اسلاميه نك حق وطوضي اولديغنه قلباً صورت جازماتده اينانوب قبول ايتمک ولساناً آني اقرار ايلکدر .

کفر : دين اسلامدن اولديني ضروره و يقيناً بيادين اصول واحكام کافه سني ويا آندن بريني قبول ايتيوب انکار ايتک ويا انکاره دلالت ايلان بر ايش ايشله مک ديمکدر .

اساساً رسول ذیشان (صلى الله عليه وسلم) افندمزدن نقل اولنه کان اصول اسلاميه واحكام شرعيه صحت نقل اعتباريله اوج قسمه آيريلشدر .

برنجي قسم ، نبی محترم (صلى الله عليه وسلم) افندمزدن تواتراً منقول اولوب ديندن اولديني عوام و خواصجه يعني عموم مسلمانلرجه يقيناً وبالبداهه معلوم اولان اصول واحكام اسلاميه در : خالق تعالى حضرت تليزنيك وجودي ، وحدانيتي ، صفات جليله سي ايله ملكرك ، كتب سماويه نك ، پيغمبرلرك ، قضا و قدر الهينك ، يوم آخرتك ، بعث بعدالموتك ، جنت و جهنمك حقيتي ، عالمك حدوثي ، كلمه شهادتك ،

نمازك ، زكاتك ، اوروجك ، حجك فرضي ، زناك ، لواطهك ، خنزيرآينك ، بغير حق آدم اولدورمهك وسائر انواع ظلمك حرمتي كهي .

دين محمددين اولديني تواتراً نهل اولنوب يقيناً ثابت اولان بونوع احكامه اصول اسلاميه و ضروريات دينيه دينوركه : بر انسان مسلمان اولوق ايجون بهمه حال بونارك كافه سني تصديقي وقبول ايتك لازم وواجبدر .

ايمانك ركن اصليسي اولان تصديقدن صكره اصول واحكام مذكوره يي مجملأً جامع بولنان (اشهد ان لا اله الا الله واشهد ان محمداً عبده ورسوله) دن عبارت اولان كله شهادتي سويلك ، ايمانك شرط ويا ركتندن معدوددر . بناءً عليه اصول واحكام مذكوره نك كافه سنه ويا آندن بعضيسنه ايناميوب دهرد وانكار ايتك ويا انكاره دالات ايلن بر فعلده بولتق كافر وبوني ارتكاب ايندئر كافر در .

ايكنجى قسم : رسول ذیشان (صلى الله عليه وسلم) افندمرك ديندن اولديني يقيناً دكل ، آنجق استدلال واجتهاد صورتيله بيلين مسائل دينيه در : الله تعالى نك صرئ اولوب اولماسى مثللى يقيناً معلوم اوليوب آنجق دليل ايله بيلين مسائل كهي .

بونوع احكام ومسائل دينيه يي قبول ورد ، اقرار وانكاره ايمان ايله كفرنك ماهيتنده داخل دكلدر . بناءً عليه احكام اجتهاديه نك منكري كافر اولماز . شوقدركه طريق شهرتله نهل اولنان احكام ومسائل دينيه ، ماهيت ايمانده داخل اولماديقندن ردوانكارى كفر دكلسهده موجب ضالدر .

اوجنچی قسم : دین محمدین اولدینی آنجق خیر واحد ایله
بیلین مسائل درکه ایمان ایله کفر بو نوع مسأله توقف ایتمز . زیرا
شرائط صحیحی حائز اولان خبر واحد ، باب اعتقادده حجت اوله ساز .
لکن باب عملده یعنی عبادات و معاملاتده دائر احکامده حجت اولور .
بناءً علیه خیر واحد طریقله صحیحی ثابت اولان بر مسئله دینی
رد وانکار خطادر .

عرض اولنان بواصله بش مسئله فرغ ایدر .

(۱) اصول مذکورہ اسلامیہ دن برینه اینانمدینی حالده لساناً
جمله سنی اقرار ایلین کیمسه الله تعالی نك نزدنده کافر در . بوکامناق
دینور . نفاق معلوم ایسه ناس عندنده دخی کافر اولور . نفاق معلوم
دکسه ظاهرده کی اقرارینه نظراً مسلمان عد اولنهرق حقتده احکام
اسلامیه اجرا اولنور .

(۲) اصول اسلامیہ یه قلباً اینانوبده دیلسز اولق کی برعندردن
دولایی لساناً اقرار ایدمه یه کیمسه هم الله تعالی نزدنده وهم انسانلر
عندنده مؤمندر .

(۳) قلبنده بر نوع اینانمق اولمقله برابر تعنداً اقرار ایتمه مکده
اصرار ایلین کیمسه هم نزد الهی ده ، همده انسانلر نظرنده بالاتفاق
کافر در . چونکه آنک بو حالی قلبنده تصدیق جزمی بولمدیغنه دلیل
وبرهاندر .

(۴) قلبنده اینانمق بولمقله برابر اقراره قدرتی وار ایکن هر
فصل ایسه عمرنده برکره اولسون اقرار ایتمه مش اولان کیمسه علمادن
بوضیلرینه کوره نزد الهی ده مؤمن ، بعض علمایه کوره مؤمن دکلدر .

(۵) بالاختیار و بلاضرورة صنمه، آیه، بیلدیزه، کونشه سجده و تعظیم ایتک و آنلر ایچون قریبان کسمک، اهل کلیسه ایله برابر کلیسه یه کیدوب اجرای آیین ایتک، خاج طاقینمق، الله دن بشقه سنه عبادت ایتک کبی شعار کفر و اماره اشراک اولان بر فعل ارتکاب ایتک، یا خود الله تعالی پی، ملنکارینی، کتابلرینی، پیغمبرلرینی، شرع شریفی، آخرتی انکار و یا بونلردن برینی تحقیر ایلک، مثلاً، صحف شریفی چیکنه مک کبی دیلده کی اقرار ایله قلبده کی تصدیقک یا لان اولدیغنه شرع شریف طرفندن علامت ظاهره قلنان بر قول و یا بر فعل کندیسندن صادر اولان کیمسه مؤمن دکلدو. زیرا او قول ایله او فعلی او کیمسه نک دیلنده کی اقرار ایله قلبنده کی تصدیقک یا لان اولدیغنه دلیل و برهاندر. آنک ایچون هر نه قدر مسلمان اسمنده اولوب اسلام دعوا سننده بولنسه بیله ارتکاب ایلدیکی قول و فعلی ایله پیغمبر ذیشان افندی می تکذیب ایلدیکی جهتله دین مبین اسلامک حدود و دأره سنندن و اهل قبله لکدن چیقوب هم نزد الهی ده وهم اهل اسلام نظر نده کافر اولمش اولور.

علاوه اولوق اوزره شونی ده عرض ایده میم که: کفر ایکی قسم اولوب بری اصلی، دیکری عارضیدر.

کفر اصلی: اساساً ضروریات دینیه دن اولان اصول و احکام اسلامییه پی قبول ایتمیانلرک کفریدر. غیر مسلملرک کفری کبی.

کفر عارضی: فی الاصل دین اسلامی قبول ایتمش و یا مسلمان صلیندن گلش ایکن بالاخره کندی آرزو و اختیار بیله اصول اسلامییه و ضروریات دینیه نک کافه سفی و یا دین اسلامک یا لکنز امر وجدانی

دن عبارت اولدیغنه قائل اولوبده دنیا ایشلرینه دائر احتوا ایله بیکی احکام مادیه و جسمانیه سیفی قبول ایتمه مک کبی ضروریات دینه دن بعضی سیفی رد، انکار، تکذیب و تحقیر ایلمک و یا خود شرعاً تحقیری واجب اولانلره تعظیم ایتمک صورتلریله ارتکاب کفر ایتمش اولانلرک کفریدرکه بونلره صرته و مرتجع دینوره زمانمزده توره ین دینسزلر بوزمه دندر. کفرک بونوعی اولکنندن دهه ضرر ودهه قنادر وحق صرته لرک کسه کلری یئمز. مسلمان قادینلرایله نکاحلری حلال و مسلمان قبرستانه دفن اولنملری جائز اولمازه ارباب کفر دن بوزمه سعادت دنیویه و اخرویه کبی نعم عظایه باعث اولان دین مین اسلامدن رجوع و خروج ایله اکا قارشو بنی و عصیان ایلمکلری ایچون توبه ایدوب تکرار دائره اسلامه طوعاً داخل اولمازلرسه دنیا ده شرعاً اعدامه، آخرته عذاب مخلده محکومدرلر .

(شمار کفر)

شمار کفر: هر عصرده هر بلده ده دیکشه بیلیرسه ده ملل غیر مسلمانک کفره دائر اولان اک مشهور شمارلری **شاپقه**، **غیار**، **زُئاره** کستیج ، غسلی ، صلیبدر .
شاپقه : عرفده شمار کفر، یعنی غیر مسلمانک مسلمانلردن تمایزینه علامت اولان باش کسوه سیدر .

غیار : اهل ذمه مخصوص بر علامت فارقه درکه بونکله اهل اسلامدن امتیاز ایدرلردی. بعض امهات کتبه بیان اولندیغنه کوره :
اوست لباسلرینک کوکسنه **رُنکجه** مخالف اولمق اوزره قورده له کبی

پر پارچه دیگر لردی . فقط علامت فارقہ ہر پردہ بر دکلدی . بلکہ ہر بلدہ دہ متعارف علامت مخصوصہ واردی . مثلاً بعض بلدہ دہ صارینک رنگی علامت فارقہ عد اولنوردی . کونک رنگ نصارایہ ، صاری رنگ یہودی یہ علامت وضع اولنمش ، بیاض رنگ دہ مسلمینہ تخصیص ایدلش ایدی .

زَنار : نصارا ایله مجوسی طائفہ سنک شمار کفر لرندن اولان برنوع قوشاقدرکہ ایبکدن معمول اولوب داخلہ قوشانیرلر .
کستیج : طوائف مذکورہ یہ مخصوص دیگر برنوع قوشاقدرکہ چارمق قالینلنندہ اولوب خارجدن قوشانیرلر .

عسلی : یہودی طائفہ سنک شمار لرندن اولان صاری رنگلی رخرقہ در .
صلیب : خرسٹیائیرک خاج دیدکلری شیدرکہ زعمارنجہ حضرت عیسانک ہیئت مصلوبہ سنک تمثالیدر .

دها اول شایقہ ، زَنار ، غیار ، صلیب کبی اهل کفرک شمار وعلامت مخصوصہ سی اولان شیلری کینمک ، قوشانمق ، طاقینمق خصوصلرینک شرعاً منہی و حرام اولدینی بیان اولنمش ایدی بونک موجب کفر اولوب اولماسنه کلنجہ : اول امرده شو جہتی عرض ایدہیمک : اعمال ظاہرہ ، احوال باطنہ وروحیہ نیک مظاهریدر . احوال قلبیہ آندہ انکشاف ایدر ورؤیت اولنور . بعض اعمال بشریہ واردرکہ قلبدن برداعی وسائق سبیلہ انسان آکا مباشرت ایدر ، تأثیرات خارجیدن آزاده اوله رق کندی حالہ قالنجہ ہمہ حال او عملی ایشلمک مجبوریتندہ اولوب آکا ممانعت ایدہ من .

بعض اعمال بشریہ دہ واردرکہ : اخوانہ موافقت ، قوتہ تبعیت ،

جلب منفعت و یا دفع مضرت کبی عارضی بر طاقم اسباب و عواملی
 خارجیہ تک تأثیریلہ مباشرت اولور . عارضی اولان او اسباب سائقہ
 زائل اولنجه عادت حالی آلمه مش ایسه انسان آندن فراغت ایده بیلیرہ
 مثلا آلمش اولدینی تربیہ نتیجہ سی اولق اوزره بر قومک معنوی ایلہ
 صبغه لشمس واحوال روحیہ سیلہ حالنشمش اولان بر آدم زی و قیافتده ، عادات
 و معاشرتده ، صورت و سیرتده او قومه تشبہ و تقلیدہ و آنلره موافقتہ
 مضطر اولور . سائق ، روحی و قلبی اولدینی ایچون کندی حالہ
 قالدیجہ اوزی و عادتی ، صورت و سیرتی ترکہ رضا و سماحت کوستره منہ
 شاید تأثیرات خارجیہ ایلہ ترکہ اجبار اولنورسه قلباً متاثر اولوب
 روحنده کی صبغه ازالہ ایدلمدکچہ او آدم بو حالدن واز کچہ منہ . فقط
 بر آدمک زی و قیافتده ، عادت و سیرتده بر قومه تشبہ و تقلیدی عارضی
 بر طاقم اسباب خارجیہ تک تأثیری ایلہ واقع اولیورسه او آدم او حالی
 ترک ایتمکده بأس کورمن و بوندن طولانی عذاب وجدانی دویماز .
 شو حالده شایقه ، زناز ، غیار ، صایب کبی اهل کفرک شمار
 و علامت مخصوصه سی اولان شیاری کینمک ، قوشانق و طاقینمق
 خصوصه سائق ، یارسوخ بولمش بر حالت روحیہ و یا اسباب خارجیہ
 اولمقدن خالی دکلدز . سائق ، اسباب خارجیہ اولدینی تقدیرده یا
 اختیاری سلبه باعث اولور . و یا خود اولماز . بو مقامده عقلاً دهابشقه
 احتمال تصور اولنه ماز . سائق ، حالت روحیہ ایسه ، مثلا تربیہ و اعتیاد
 تأثیریله بر آدمک روحی صبغه کفر ایلہ بو یانق و قلبی او معنویت ایلہ
 اتصاف ایتمک نتیجہ سی اولق اوزره اللہ ، رسول اللہ ، شریعتہ و سایر
 ضروریات دینیہ ایمان و اعتقادی اولدینی ایچون سوه سوه اهل کفرک

شعار و علامت مخصوصه سنی اکتسا و انخاذا ایتس ، اولورسه ، او کیمسه نك كفرنده شك وشبهه یوقدر واوله ماز زیر ا بو اعمال ظاهره . سنه سائق ، عین کفر دره . آنك ایچون فقهای کرام حضراتی (کفره نیت ایلمن کیمسه او آندن اعتباراً کافر اولور) دیورلز . و کذا شرع شریفده علامت کفر عد اولنان شیرلی استحلال ویا حرمتی استخفاف ایدنلرک کفری شبهه مندره . شعار کفرده تشبیهی استحلال ایتمکده بو قیلدندره . زیرا (من تشبه بغير نافرلیس منا) حدیث شریفی ایله شعار کفرده اهل کفره تشبیهک نهی اولندینی عصر سعادت نبویه دن زمانمزه قدر تواتراً نقل اولنه کلیمکه اولوب امت محمدون هر عصرده بولنان مجتهدین کرام حضراتی بونک حرمتنه اجماع و اتفاق ایتمشلدور . بناء علیه اهل کفره شعار کفرنده تشبیهک حرمتی ادله شرعیه دن اجماع امثله نابتدر . آنك ایچون استحلال و استخفافی کفر دره .

شعار کفر اولان شیرلی اکتسا و انخاذاه سائق ، اضطرار او کراه حلیجی یعنی ال ، آیاق کبی اعضای بدنیه دن برینی کسمک ویا اولدورمک ایله تهدید و اجبار صورتیله و قوعبولورسه دفعه حضرت ایچون قلبده ایمان و تصدیق محافظه اولندینی حالده آنجق او مدت اثناسنده شایقه وساره کبی شعار کفری کینمکه ، انخاذا ایدنمکه شرعاً رخصت ویرلمشدر . بناء علیه بویله بر حال اضطراره معروض قالان برمسلم شعار کفری اکتسا ایتمکله کافر اولماز .

و کذا غیر مسلمله بکزه مک قصدی اولدینی حالده هلاکی ایجاب ایدن حرارت و برودتی دفع ایتمک ضرورتندن ایچون ملل غیر

مسلمه نك قلنسوه و كلاهني كينمك كفرى ايجاب ايتمز .

و كذا حربده خدعه و دشمنك اسرار و احوالنه و قوف و اطلاع
ويا مسلمانلردن غير مسلملك ضررلرني دفع كبي عامه مسلمينك
نفعنه عائد بر مقصد خيرك و بر مصلحت دينيه نك استحصالى ايجون
بالاختيار شمار كفرى ا كتسا و اتخاذ ايدينك موجب كفر اولماز .
فقط تجارت ، تحصيل و سياحت كبي منافع خصوصيه ايجون
ديار كفره كيدوبده اوراده ويا ديار اسلامده بيلهرك ، بلا ضروره
و بالا اختيار شاپقه و سائر شمار كفرى ا كتسا ايلين مسلم حقنده اختلاف
اولنمشدر . فقهاى كرامك ا كثريسى (اهل كفره مخصوص و آنلك شعارى
اولان قلنسوه يعنى شاپقيني بلا ضروره و بالا اختيار كينمك كفرده
زيرا بوعلامت كفرده . آنك ايجون بونى انجق مجوسيت ، نصرانيت
يهوديت كبي انواع كفردن برينى التزام ايدنلر و قلبلرى صبهته كفر
ايله صبهه نمش اولانلر كيه بيليرلر . اساساً علام ظاهره ايله امور باطنيه
استدلال و آنك اوزرينه حكم ايتمك عقلاً و شرعاً مقبول و معتبر بر
طريقدر) ديورلر .

ققهاندن بعضيلرى ده (مجوسى ، نصارى و سائر ملل كفاره مخصوص
و آنلك شعارى اولان قلنسوه يعنى شاپقيني بالا اختيار كيهن بر مسلم آنلره
تشبه و تقليد ايلديكى ايجون آثم و كناهكار اولورسده كافر اولماز)
ديورلر .

ايكنجى په قائل اولانلر اسباب موجب اولوق اوزره ديورلر كه :
شاپقه كبي شمار كفرى بالا اختيار كيهن كيسه اساساً موحد ، قلباً
و صدق اولدينى ايجون مؤمندر .

اجله مجتهدین کرامدن امام اعظم (رحمه الله) حضرت تلمیذی دیمشدرکه:
(بر کیمسه ایمان واسلامدن آنجق کیردیکی قاپودن چیقار) مشارالیه
حضرت تلمینک یوقولنه نظراً ایمانه اصاله دخول آنجق اقرار و تصدیق ایله
اولور. چونکه ایمانک رکئی بونلردن عبارتدر. شابقه کیین کیمسه ده
ایسه اقرار ایله تصدیق موجوددر.

(جواب)

ایمانک بر طاقم لوازمی واردرکه آنلرک عدسی ایله ایمانک ضدی
اولان کفر تحقق ایدر. مثلاً الله تعالی یه، انبیای کرامه، کتب الهیه یه
تعظیم، لوازم ایماندندر. بونلری استخفاف ایسه تعظیمه منافی اولدینی
ایچون کفردر. بناءً علیه منافی تعظیم و اماره تکذیب اولان اقوال
و افعال شرعاً موجب کفر عداولمشدر. اساساً شرع شریف نظرند
علامت تکذیب و اماره انکاره مقرون اولان تصدیق و اقرار معتبر
و معتدیه دکلدرد.

شوحالده امام مشارالیه حضرت تلمینک قولینک مناسی: ایمانک شرعاً
معتبر اولان رکنازیتته منافی بر قول و یا بر فعل بر مسلمدن صدور
ایتمدک، کافر ایلماز دیمکدر. نته کیم پوته سجده ایتک؛ الله تعالی یی، انبیای
کرامی، کتب الهیه یی، شرع شریفی تحقیر و استخفاف ایلک کی منافی
ایمان اولان برایش ایشله مک و یا برسوز سویله مک علامت تکذیب و اماره
انکار اولدینی ایچون مرتکبک کفری ایله حکم اولنور. فتاوی هندیه
و محیط برهانی ده دینیلیورکه (باشنه قانسوه مجوسیه یعنی مجوسی شابقه سی

کیهن کیمسه نك کفرینه قائل اولانلرک قولی صحیحدر .
بو قوله ذاهب اولانلره کوره سوء عقیده دن نشأت ایلدیکی ایچون
قلنسوه مجوسیه بی کیهن کیمسه نك کفریله حکم اولنور . نته کیم
(بن مجوسی بم) دیهن کیمسه نك بوسوزی سوء عقیده سفی تصریح
اولدینی ایچون کفری ایله حکم اولمشدر .
چونکه مجوسیلره مخصوص و آنلرک شعاری اولان قلنسوه بی
بالاختیار کیمه نك روحاً مجوسیت معنویتیه صبغه لشمش اولدیفنه علامت
واماره در . آنک ایچون بو قیافتده کورولنلرک کفری ایله حکم
اولنور .

شونی ده عرض ایده یمکه بتون ملت لرک باش کسوه لری ملیت و دینلریله
برنوع علاقهبی حازدر . شاپه لر ، سرپوشلر مثلا آوروپا ملکه کتترلنده
نه قدر مختلف اشکاله آریلورسه آریلسون هپسنک بر اصلدن تنوع
ایلمش اولدینی وزمان ، مکان اعتباریله اختلاف ایتمکله برابر اواصلک
روحی محافظه ایلمکده بولدینی شبهه مزدر . شو حالده شاپه دین
وملیت علائمی اولدینی ایچون اونی کیهن کیمسه (بن بو ملتن ایم)
دیه بر اقرار یامش اولور . مقابلنده صراحت بولنان بو کبی دالئلر
ایسه هر حالده صریح کبی معتبردر . آنجق مقابلنده فملاً صراحت
ایمانی کوستره ن احوال و اعمال قارشوشنده بو اقرار حکمدن ساقط
اوله بیلیرسه ده مسلمانلر نظر ننده او آدم کندیسفی شبهه دن قورتاره من .
بومسئله شاپه بی کیمکه سائق ، قلبی و روحی اولدینی تقدیرده در .
سائق ، قلبی اولورسه ایمانی کوستره ن احوال و اعمالک ریا و نفاقه
واو آدمک ده صرائی و منافق اولدیفنه حکم اولنور .

اساساً شعارلرنده غير مسلمانره تشبهدن منع ونه ايله شارعك مراد ومقصدي بين المسلمين مليت اسلاميه تاسيس ايلكدور . مليت اسلاميه نك مداري ده مليت كفره مخصوص اولان شمارده وعادات واطوارده كفاردن آريلوب آنلره بكنزه مه مكدور . بناء عليه مليت اسلاميه ده غيرت كوسترمك واطهاز صلابت ايتك شمار ايمانندنره آنك ايچون هر مسلمان ، احكام دينيه به مغاير ويا خاصه مليت اسلاميه به مخالف اولان اموردن اجتناب اتمليندور .

شوحالده لساناً اقرار ويدناً عبادت وعمل كهي مليت اسلاميه نك علام ظاهره سيله اصلاً علاقه دارلق كوسترميوب زي وقيامندن بشقه غير مسلمانردن فرقي قائله مش اولانلر قيامتليخنده آنلره بكنزه ديورينجه باطنلرده كي ايماني تمثيل ايده چك ومليت اسلاميه بي كوستره چك هيچ برحاللي قالمدين ايچون (من تشبه بقوم فهو منهم) حديث شريفنك مقتضاي مينفنججه او آدمليك زهره كفريه التحاق ايتمش اولدقلرينه صورت قطعيه ده حكم اولونور . بو حقيقتي توضيح ايچون بر مثال ايراد ايتك ايترم : هر دولتك علامت مخصوصه بي حازر بر نوع بايراني واردركه او بايراق هانكي واپورك ، زرهلينك ، طياره نك ، مكتبك ، بنانك اوزرنده بولنورسه او دولتك اولديغنه حكم اولنور . مثلاً بزم ياووز زرهليسي بتون مشتملاقي اعتباريله ، انكليز ، فرانسز آلمان زرهليرينه بكنزه ديكي حالده يالكنز شانلي بايراغنك علامت فارقه سيله آنلردن امتياز ايدور . بو علاقتي كورنلر بزم زرهليمز اولديغنه حكم ايدرلر . بشقه دولتلك بايراغنك بزم زرهلي به چكيلمه سي سياة صرفاً ، عادة وقانوناً ممنوعدر . آنك ايچون بونك مرتكبي خيانت

وطنیه، جنایت ملیه واجنبی طرفدارانی جریمه اتهام ایدیلرک اعدا منه حکم اولنور . بوتک ایچون دول متمدنه دن هیچ بریستک بایراغنی بزم واپورلره ، زرهیلره چکمک صورتیه آنلره تقلید وتشبهه یلته مکه هیچ بر کیمسه جسارت کوستره مز .

ایشته بوتک کبی (من تشبهه بغیرنا فلیس منا) حدیث شریفیه مسلمانلرک ، شعار وعلامت کفرده غیر مسلملره بکنزه مکه یلتنملری منع اولنمشدر . بناء علیه بزم زرهلی ده بشقه دولتلرک بایراغنی کورنلر اوزره لینگ بزم اولدیغنه حکم ایده جکلی کبی شایقه ، صلیب وسائر شعار کفری کیهن و طاقانلرک ده ملیت اسلامیه دن چیقوب زمرة کفریه التحاق ایتمش اولدقلرینه حکم ایدرلر .

فقهای کرام حضراتی قانسوه مجوسیه یی کیهن گیمسه نک کفرینی تصریح ایلدکلری طایفه قانسوه یهوددن بحث ایتیمورلر . بونلری کیتمک موجب کفر دکلی در دیه سؤال اولنورسه جواب اولق اوزره دیرزکه : شرع شریف نظرنده کفر، ملت واحده عد اولندیغی ایچون علامت کفر بیتنده فرقی یوقدر .

بناء علیه عناصر غیر مسلمه دن هر هانکیسی اولورسه اولسون آنلرک شعاری اولان شیلری کیتمق، طاقیمق، قوشتمق قول صحیحه کوره کفرده . (من تشبهه بغیرنا فلیس ، مثلاً اشبهوا بالیهود ولا بالنصارى) حدیث شریفی ملل غیر مسلمه یه مخصوص اولان شعار وعلامت بیتنده شرعاً فرق اولدیغنه دلیل برهاندر .

شایقه ، زنا ، صلیب کبی شعار کفردن معدود اولان شیلری اکتسا وانخاف ایدیمکه شرعاً مأمور به اولان شیلری ، (مثلاً نمازی ،

زکاتی (ترك و منہی عنہ اولان شیلری (مثلاً زناپی، سرقتی) ارتکاب
بیننده فرق نہ درکہ اولکیلر علامت کفر و امارۃ تکذیب عداولندی
حالده ایکنجیلر عد اولتیور دیه بر سؤال ایراد اولنه جق اولورسه
جوابنده دیرزکه :

واقعاً ایکنجیلرده اولکیلر کبی شرعاً ممنوع ایسه ده هوسات و شهوات
نفسانیه بونلری ایسلامک فطرت سائقدر آتک ایچون قوه شهویه لری
عقلارینه غالب اولان زمره بشر دیناً ممنوع اولان مشتهیات نفسانیه پی
ارتکابدن خالی قالمازه. ایشته بونک ایچون شارع اولنری امارۃ تکذیب
عدایتمه مشدر. فقط اهل کفره مخصوص اولان شمار و علامتی ارتکاب
ایچون بویله بر عذر و فطری بر سائق یوقدر. زیرا بو اساساً نفسک
آرزو و میل ایلدیکی مشتهیات جمله سندن دکلدر. شو حالده بونی ارتکابه
سائق سو عقیده دن باشقه برشی اولدینی ایچون شرع شریف ممنوعات
شرعیه نك بوقسمنی علامت کفر و امارۃ انکار عدایله مرتکبک کفرینه
حکم ایتمشدر .

فقهای کرام حضراتی (بر مسئله طقسان طقوز احتمال، کفره
و بر احتمال ده عدم کفره اولورسه عدم کفر جهتی ترجیح اولنقی
صورتیله فتوا ویرمک اقتضا ایدره. زیرا کفر جنایت عظیمه اولدیندن
عدم کفره بر احتمال وار ایکن تکفیر جهته کیدمک موافق اولماز)
دیسورلر. شو حالده بوکا نظراً شمار کفری ارتکاب ایدنر نصل
تکفر اولنه بیلیر دیه سؤال اولنورسه چوابده دیرزکه : فقهای کرام
حضراتک بوسوزلری مسئله ده عدم کفره احتمال بولنדיغنه کوره در :
بویله بر احتمال بولنمدینی تقدیرده بالاجماع کفر ایله فتوا ویرمک ایجاب

ایدر . بونیکله برابر فقهانک بو سوزلری نفس الامرہ دکل ، احتیاطہ
 مبتنی در . مسئلہ ایمان و کفرہ متعلق اولدیغندین غایت مهمدر . آنک
 ایچون بر مسئلهده کفرہ طقسان طقوزدکل ، حتی بر احتمال بیله اولسه
 عقلی باشنده بر مسلم بویله مخاطرہ لی شیئہ مجاسرت ایتمه ملیدر . زیرا
 اوبر احتمال نفس الامرده موحب کفر اوله بیلیر . مسلمان ایچون
 الک معتبر و الک قیمتدار اولان ایمان و اسلام مسئله لرندہ شائبہ کفر اوله بیله جک
 شیردن صاقینملریخی اخوان دینه توصیه ایدر و (اعملوا فسیری الله
 عملکم = دیله دیکیزی ایشله ییکیز . الله عملکیزی کوریور ، نظم
 کریمک مضمون عالیسنه اخوان دینک نظر دقتنی جلب ایلم (فاعتبروا
 یا اولی الابصار) والسلام علی من اتبع الهدی
 الحمد لله رب العالمین والصلاة والسلام علی سید المرسلین وعلی اله
 واصحابه اجمعین فی کل وقت وحين آمین .
 ۱۰ ذی الحجة سنه ۱۳۴۲ ، ۱۲۰ تموز سنه ۳۴۰



()

: